



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 3

Yangia anidakangma :



Tir Yimiyim



tir\_yimiyim



tir yimiyim

TAPAK 7

**Tatidang kata ochishia  
magiteter: Rahul Gandhi**

**Tenangzüktepba meyanglutetra  
Iran amaktsü US renema lir: Pete**



VOL. XXIII ISSUE NO. 227 (ADOK 227) DIMAPUR AMUNGNÜ (SUNDAY) MONUPII (MAY) 31, 2026

₹ 5.00

## BJP sorkari totzü aser LPG jenjang atuba aitsür: NPCC

**Dimapur, May 30, 2026 (TYO):** BJP-i aniba sorkari totzü aser LPG jenjang tupet atuba ajanga nübertem timtemdaksür ta Nagaland Congress-i aitsüogo.

Dimapur nung totzü aser LPG nung jenjang atuba anema lungkak aitba sentong ka agidang Nagaland Pradesh Congress Committee Working president C Apok Jamir-i "BJP sorkari junga ketdang masüba aser tim masüba ajanga nübertem timtemer" ta ashi.

"Asenok nisung shiai BJP-i iba mapa inyakba anema ola adoktsü tim. Centre sorkari nübertem taginübatem ama meinyak tashi asenoki ola adoktsüla. Sorkari petroleum aser gas jenjang meyipa mereprang tashi nübertem timtemba manentsü" ta Apok Jamir-isa metetdaksü.

Congress party dang masü saka Nagaland nung civil society

shia aser tangatetba shitak aliba senso shiai MLA tem dang ola adoktsü rongshitsüla ta paisa ayongzük.

Parnoki Centre sorkar dang Naga nung taginüba anema ozüing mebenoktsü akhangtsüla. Iba ya yimiyim ka dang masü saka nübertem nem temeten magütsü tashi movement ka lir ta Apok Jamir-isa metetdaksü.

"Sorkari Middle East nung mesüra Ukraine nung rara lir ta tatemtsü ashitsü akok saka iba ajanga asen linük nung mekongshir. Global market nung crude oil barrel jenjang tajemtiba alidang sorkari petrol mesüra gas indang jenjang majem" ta paisa ashi.

Congress-i lungkak aitsü ayongzükba ya party atema dang masü saka public ajunga atema lir ta Dimapur Congress Committee president Kutoho Chishi-ia ashi.

## NSF-i tanur tetsür dak tashiyim inyakba aitsür

**Dimapur, May 30, 2026 (TYO):** Dimapur nung O. Watimeren Jamir aser pa den yaritepertemi tanur tetsür ka dak tashiyim inyakba aitsür aser iba ama tesempatsü mapa magizüker ta Naga Students' Federation-i metetdaksüogo.

NSF-i tanutsüla aser lar kibong den külemi noktaker aser parnoki temeten bushiba nung yariteptsü. Onoki tanur shia temeten, akhüm kümzüka ayutsü atema nangzükshir ta President

Mteisuding aser General Secretary Kenilo Kent nati sangdong ka nung ashi.

Ozüing amertemi iba ken o jungjunga bushisingdang asütsüla aser tai tonglokja alir aser sendaktepa alir ajak ozüing tapet agi merenshitsüla ta tenatisa ashi.

Tanur dak tashiyim mapa inyakba kodanga magizüksü aser nisung ajaki tanutsüla aser lar kibong den yariteptsü ayongzükba ta NSF-isa metetdaksüogo.

## Nagaland MP Supongmeren-i NH highway projects reprangdanga senzü

**Kohima, May 30, 2026 (TYO):** Nagaland nung National Highway mapatong ajak mapang shitak nung atemtsü atema taruba ita pezü tenük yoka reprangtsü aser lateta yutsüba ama meinyaketba contractor tem agientsü ta Lok Sabha MP & Nagaland Pradesh Congress Committee (NPCC) president, S. Supongmeren Jamir-i ashi.

MP Supongmeren-i May 28 aser 29 anogotem Dimapur nungi Kohima aser Kohima nungi Jesami tashi National Highway yangluba tesemtem semdanga senzür Honibarnü Congress Bhavan nung osangbener den jembi.

National Highways and Infrastructure Development Corporation Limited (NHIDCL) ajanga inyakba mapatongtem nung implementation, maintenance aser safety standards asadangtsü atema pai sema senzü ta Supongmeren-i ashi.

Pa den külemi district administration, NHIDCL ketdangsurtem aser contractor tem liasü aser parnoki road safety measures, drainage maintenance aser construction quality nung temulung agüja senzü.

Assam arrtsü nungi Kohima tashi road safety infrastructure ya NHIDCL standards ama masü aliba ajitetogo. NHIDCL

standards dang parnok guidelines ama inyaktsü aser contractor temi tanga state tem nung aliba kasa standards ama yanglutsü atema tetuyuba agütsüogo ta Supongmeren-i osangbener dang ashi.

Tesem kar nung drainage systems tangbanga aliba aser anepalu mesüi yutsüba ajanga lenmang raksar aser iba atema contractors nem mapang atakzüksüogo ta pai ashi.

Dimapur-Kohima tsüingda lenmang nung road dividers shitak mali aser karbo approval shitak mali yanglu aser iba ajanga lendong ataloker. Bangdang NHIDCL ketdangpurtemi signage shitak lia road divider mesüra access opening atema temelaba agütsütsüla ta Supongmeren-isa metetdaksü.

Kohima bypass road dak alaka NHIDCL kübok highway lenmang teimbaka taküm renemtsü imlar ta paisa shisem.

Patkai Bridge-Medziphema stretch atema original contractor-i mapa shitak meinyakba atema anentsüogo. Tang local contractor kati khen atema anepaludar aser NHIDCL-i lung tsükba khuret asoshi ayong temdanga apu ka yanglutsü shidangogo ta paisa metetdaksü.

Lenmang nung aluminium crash barriers aser road signage auyaba ya public safety atema

lendong tulu lir aser tesem 35 tema nung ozüing alema nakmati aruba ajanga lenmangtem shibanga lir ta MP Supongmeren-isa ashi.

Phek district nung pai BSF Camp nungi Chakhabama stretch tashi reprangdanga liasü aser idakji ketdangsurtemi anogo 20 tsüingda maintenance works inyaktsü nangzükogo.

"Chakhabama-Kikruma tashi Kohima-Jesami NH nung Package-II ya kangasa tongtipang lir aser taküm January nung revised deadline tembangaka mapa 42% tashi dang inyakteta lir" ta MP Supongmeren-i ashi.

Iba mapang contractors, district administration, Chakhesang Public Organisation (CPO) aser Chakhesang Students' Union (CSU) den ajurutepa senden amendang contractor-i ita pezü tsüingda mapa 80% inyaktsü nangzükogo ta paisa metetdaksü.

Contractor-i September tashi nung nangzükba ama meinyakra NHIDCL guidelines nung lateta aliba ama termination proceedings tenzüksü ta paisa shisem.

Iba inspection team nung state departments, highway engineers, NHIDCL regional officers aser district administrations dena liasü ta Supongmeren-isa ashi.

## PM-USHA scheme ajanga sorkar college tem renloker; DGC nung mapatong 3 sayaogo

**Dimapur, May 30, 2026 (TYO):** Dimapur Government College nung Pradhan Mantri Uchchar Shiksha Abhiyan (PM-USHA) scheme kübok mapatong tulu asem lapokogo.

May 30, 2026 nü DGC campus nung PM-USHA scheme kübok yangluba mapatong asem lapokba sentong ka agiogo.

DGC nung mapatong tasemtemji "Grants to Strengthen Colleges" component kübok modern Academic Building ka, Incubation Centre/Skill Hub ka aser "Gender Inclusion and Equity Initiatives" component kübok Girls Hostel ka lir.

Iba sentong nung Higher Education and Tourism Minister Temjen Imna Along-i tetushi süa jaoker ka ama shilem agi aser pai nungshilung sayatsü.

"Tanü tasen lapokba facilities ajanga Nagaland nung higher education tejakleni aobanungalüzüing ka atonger. Nagaland nung sorkar college ka nung tang mezüing atema Skill Hub ya amenoker" ta Minister Imna Along-i ashi.

"Asenok atema educational infrastructure agi dangbo meperir aser tayongzükba tulubaji human resources tajung adokdaksütsüba lir. Tanü shisaliok ya azüingtsü aser zülutsü dang masü saka ajak adentsüla aser temelenshi bener

arutsüla. Asenoki shisaliok yimya melenshiba aser human resources renlokdaksüba ajanga Nagaland tarutsü yangertsü" ta pai ashi.

Alima nung technology ainba, artificial intelligence aser alima rongsenketzüing o yimtenren meyoktepa ajanga kanga melenshir. Anungji shisaliok rejutemi kaketshirtem jungjunga anitetsüla ta Minister Along-isa ashi.

Nagaland tajungba akümtsü asoshi merükmejuba, lipoküm wazüka ayuba aser terenlok maparen ya sorkar kija nem meyutsüi senso shiai shilem agitsüla ta paisa shisem.

Nagaland nung mapa manguba indang olen ka jembidang "asenoki skill-based education nung temulung agütsütsüla" ta Along-i ashi.

Skill Hub ajanga kaketshirtem academic degrees den dang masü saka practical skills dena graduate asütsü ta pai ashi.

"Nagaland nung sorkar infrastructure mapatong aika inyaker aser private-sector standards ajanga atur. DGC nung tesayurtem aser alumni ajanga campus anepaluba aser tobur junga ayuba atema tenüngsang agütsür. DGC ya higher learning atema tongtipang reju ka südaksütsü atema ajaki maneni

külemi yaritepa aotsü ayongzükba" ta Minister Along-isa metetdaksü.

"DGC ya youth tourism aser educational hub ka kümdaksütsü sentong lir. DGC nung biodiversity parks, recreational facilities, gymnasiums, aser youth delegates, tourists, & skill development participants anenzüksüsa tourism-friendly infrastructure yanglu nung kanga ajungtsü" ta Minister Along-isa ashi.

Rs 5-10 crore alangba tourism-related project ka bilemdar aser iba asoshi college administration-ia concept proposal tajung ka renemtsü ayongzükba ta paisa shisem.

"Nagaland tarutsüji nübertem dak keta lir. Asenoki asen human resources melenshiteter asen loktitem aser asen state melenshitetsü" ta Along-isa metetdaksü.

"Dimapur Government College nung PM-USHA mapatongtem lapokba ajanga Nagaland nung higher education tashi aitsü aser lanurtem nem maangka tuluba agütsütsü merangba sayur" ta Secretary, Higher Education Department, Sarita Yadav-i ashi.

Item facility ajanga Dimapur Government College nung academic environment tajungba

akümtsü aser innovation, entrepreneurship, skill development, o student welfare ajungkettsü ta lai ashi.

Dimapur Government College nung mapatongtem takok ngua inyakba atema tenüngsang agütsür aser maneni iba reju temaba jenjangi atutsü amanger ta Yadav-isa metetdaksü.

"PM-USHA scheme ajanga higher education nung temelenshi tajung bentsür arur aser Ministry of Education-i tenzükba centrally sponsored scheme ajanga linük nung sorkar college tem tashi itdaksür" ta State Project Director (PM-USHA), Sentianger Pongen-i ashi.

"Nagaland nung sorkar college tem tejakleni odar aser kaketshir teimba kümogo. PM-USHA mapatongtem ya shilem lemsar inyaker aser funds shitak amshiba den utilization certificates agütsüba sülen ang tanüngba installments angur. Dimapur Government College-i iba scheme kübok mapatongtem jungjunga inyakba atema tenüngsang agütsür" ta Sentianger-isa ashi.

Ministry of Education ajanga Nagaland nung model colleges tasen pezü mulunga agizükogo aser iba ya asenok atema takok tulu ka lir ta paisa shisem.

"PM-USHA scheme kübok Academic Building ya Rs 4.22 crore endoka yanglu aser iba nung classrooms 13 lir. Classroom nung kaketshir 780 aser 910 tashi mentetsü akok aser nungdakra tarutsü nung vertical expansion sütettsü atema design süa lir" ta Superintendent Engineer, Education Division, NPWD, Hokato Sema-i ashi.

Girls' Hostel ya Rs 6 crore endoka yanglu aser azüklen menden pezü amentepa atuba ki nung takdang 46 lir ta paisa ashi.

Mezüngbo Incubation Centre/Skill Hub project yanglutsü asoshi ali dak sendakba tebilemstü kar aliba agi mapa metenzükleti aru saka mapa tenzükba küm ka tsüingda iba ki renemogo. Iba ki nung takdang tenet lir ta Hokato Sema-isa ashi.

Paisa department, contractors aser sendaktepa alirtem dang mapang jelia mapatongtem renemba atema tenüngsang agütsü.

Sentong nung Associate Professor and Head of the Department of English Dr. A. Sentiayula-i anir nungshilung sayaba shilem agi, Associate Professor Rebaino Ao-i meshiteta sarasadem aser DGC Vice Principal Dr. Meripeni Ngully-i anküp tepela o jembi.

### WENN aser SIDBI nati Business Governance Workshop ayongzüka agi



**Dimapur, Monupii/May 30 (TYO):** Women Entrepreneurs Network Nagaland (WENN) aser Small Industries Development Bank of India (SIDBI) na longjemer Kiphire, Noklak, Shamator, aser Tuensang nung May 19 nungi 29 tsungda tetsür entrepreneur tem asoshi Business Governance Workshop tem ayongzüka katsüogo.

Nagaland nung tetsür entrepreneur tem entrepreneurial capacity tashi taiba kümdaktsütsü aser shishilemba balala renloka yoktsü atema WENN-i tang district balala nung jenjang agia

aliba nung shilem ka ama item workshop tem ya ayongzüka agiogo.

Session tem ya business compliance aser documentation dak rangloker agi, kong trade licensing, FSSAI certification, Udyam registration, financial literacy, skill development aser entrepreneur tem nongita yaritsü atema sorkar scheme balala indang tangazükba agütsüba densema lir.

Workshop tem ya regulatory inyakymtem tongmelangba kümdaktsütsü aser sentong nung shilem agirtem nem parnoki shishilemba renloka yoktsü asoshi shisatsü agütsütsü

nükjidong nung ayongzüka agiogo.

District balala nung tetsür entrepreneur temi kanga jangrabangra shilem agiogo aser iba ajanga angazüktsü jangrabasa aser business renloka aotsü asoshi parnok bendanga agütsür aliba sayur.

Kasa mapang nung WENN-i, iba workshop takok ngua agitsü asoshi teyari agütsüba atema district administration aser stakeholder tem dang kanga pelaba lemsatepogo, aser Nagaland nung tetsür entrepreneur tem nem tashi agütsütsü asoshi maneni bendanga agütsü inyaktsü nangzük.

### Dimapur nung Himalayan Cleanup sentong ayongzüka agi



**Dimapur, Monupii/May 30 (Agencies):** Dimapur nung May 30 nü The annual Himalayan Cleanup (THC 2026) sentong ayongzüka agiogo, koba State Representative, Living For Environment (LiFE), Department of Environment, Forest and Climate Change, Dimapur Division aser SBM.U, Nagaland nung longjemer ayongzüka liasü.

Taoba küm ama masü takumbo Forest Office Complex ground nung janaa bendendak ka merketeta liasü. Iba inyakym ya World Environment Day omen Inspired by Nature. For Climate. For Our Future den kanga süteper liasü.

2018 küm tenzükba sülen THC ya Himalayan state tem nung plastic pollution anema jenjang agiba telutiba kümogo. Iba drive ya jana bendentsüba atema dang masü, saka plastic agi alima menentsüba atema tayongzüka agütsütsü asoshi

detailed waste aser brand audit densema agir.

Merekmeju sentong ya anepdang 6 ako nung tenzük kong nisung 24-i shilem agia liasü. Sentong nung shilem agirtem rongnung LiFE team züngsem 6 aser North East Institute of Social Sciences & Research (NEISSR) nungi kaketshir 6, Salesian College of Higher Education nungi kaketshir 6, Pro.Rural nungi 2, Forest Department nungi 1 aser pei mulungka nung arur parnok 3 densema liasü.

Jana junga mintokba ya koda lendong tulu iba indang metetdakja, volunteer ka syringe needle agi atuba indang lemsatep. Iba volunteer ya tetanus shot ka atema mozükidangi anir oa liasü.

Ajak senteper iba team yagi jana juli 23 merketet, koba seret 261.521 shi liasü. Jana bendenba sülen comprehensive waste aser brand audit ya 4 ako tashi agi. Audit ajanga janatem

rongnung disposable plastic tem timba aliba ngutetogo. Janatem rongnung BioGlobal disposable plates (5.720 kgs) 107, plastic spoons aser forks (0.435 kgs) 183 aser disposable food containers (1.91 kgs) 106 densema liasü.

Shikar Pan Masala (76 wrappers) aser Signature (60 packets) Magic Moments plastic quarter bottle (20) AC Black (485 grams) quarter bottle nung amala janatem bendena entokogo.

Kasa mapang nung LiFE Project Coordinator Chu thuzhu ni Chache (Zheni)-i ashiba agi, tesem mashi mashi nung jana entokba ya nüburtem health aser tzü-mopung atema amokmeren ka lir. Audit ajanga ngutetbatem indang tenüngsanga jembiba mapang lai, khen dang amshiba osettem aika ngutetba ajanga asenok anogoshia libaliro nung item osettem tali amshiba indang jangjar ta ashi.

### Planning & Transformation Department DDC den tepila sentong agi

**Dimapur, Monupii/May 30 (TYO):** Planning & Transformation Department Deputy Development Commissioner (DDC) Meyinuksung den tepila sentong May 30 nü Department of Planning & Transformation, Kohima Conference Hall nung agiogo.

Sentong nung o jembiba mapang Addl. Development Commissioner, Vilhouhunuo Sachu-i, Meyinuksung ya 1996 küm Nagaland Public Service Commission ajanga Planning Assistant ama sorkar tenzükba wadang nung ajemok aser iba sülen state kübok tesem balala nung inyaker 2025 küm April ita Deputy Development Commissioner jenjanga

ajungkettsü aser superannuation küm atongba sülen 2026 küm May 31 nü mapa nungi anisüngzüker ta ashi.

Sentong nungsa Principal Secretary & Development Commissioner Y. Kikheto Sema, IAS-i, Meyinuksung-i Secretariat nung küm 21 tenzükba densema küm 39 sorkar tenzükba indang bilemtetshia jembiba, aser ashiba agi, pa Planning Department nung officer tem aika den inyakogo, shirnok ajak mapa nungi anisüngzüker. Paisa, pa career tatembang ka dangi aruba mapang Planning & Transformation Department nung inyakshiba atema pelaba lemsatep.

### NCM nung Music Associate Diploma Programme agütsütsü



**Dimapur, Monupii/May 30 (TYO):** Nagaland Conservatory of Music (NCM)-i May 29 nü Music Associate Diploma Programme ka amenokogo. Iba Programme lapokba sentong ya Nagaland Conservatory of Music campus nung agi, kong Arogo lenirtem, tesayurtem, musician temi shilem agia liasü.

Iba Diploma Programme ya Nagaland Baptist Church Council (NBCC), General Secretary Rev. Dr. Mar Pongener-i officially lapokja liasü. Pai Nagaland aser bendanglen aliba musician tem anitetsü atema college bendanga agütsür aliba atema tenüngsang agütsü liasü.

Kasa mapang nung Naga Baptist Associations (FNBA), General Secretary Rev. Dr. H. Gideon-i bendanga agütsür sarasadem ka agi. Pai iba programme, faculty aser tarutsü kaketshirtem atema Tsüngrem temoatsü meshizüka sarasademja liasü.

Sentong nung o jembiba mapang NCM mendenbuba-i, Arogo aser riju balala nung tenzüktsü atema qualified musician tem agi anüngba bentetsütsü nükjidong nung iba Music Associate Diploma agütsütsü asateta liasü, ta ashi.

Iba diploma programme yagi kaketshirtem nem music performance, theory, musicianship, aser professional ministry-oriented music education dak sendakba nung tangazükba agütsütsü. Tangazükertem nem practical skill, shisatsü, artistic discipline aser music, worship ministry, tesayuba aser tanga creative industry tem nung nüngdakba tasatem agütsütsü nükjidong nung iba programme amenokogo.

Temetetsü kaji Nagaland Conservatory of Music ya Nagaland University nung affiliate süa lir aser Bachelor of Performing Arts (Music) degree programme aser maneni zünyonga aotsü asoshi renema aliba kaketshirtem nem küm ka atema Integrated Musicianship Certificate agütsür.

Music Associate Diploma amenokba ya Conservatory asoshi jenjang aketba music education agütsütsü atema bendanga agütsü inyakba nung alizüng tasen ka tongtetba asütsü.

Music Associate Diploma atema admissions lapokogo aser tejangrartemi college nung apply süa maneni osang tejangjaba agütsü metetdaktsüogo.



May 30, 2026 nü Pune nung osangbenertem senden ka nung Chief of the Army Staff (COAS) General Upendra Dwivedi-i kaket ka sayatsüdü tangokba noksa nung angur.

## Delhi Police-i ISI den tesendaktep alir nisung 9 puogo

**New Delhi, Monupii/May 30 (Agencies):** Delhi Police Special Cell-i Pakistan nung Inter-Services Intelligence (ISI) aser Mumbai nung telungpurtem den tesendaktep aliba nisung 9 puogo; parnoki Mumbai aser Delhi na densema tongtibang yimti aika nung sepaitem aser sepaitem kiojen amaksü sentong liasü. Arrtsü adener alirtem tetuyuba nung parnoki inyaker aser nüburtem tsübudaktsüba den külemi security raksatsütsü atema parnok nem tetuyuba agütsür liasü. Intelligence osang nung ajemdaker Delhi police Special

Cell-i mita aoba mapang nung melung melemi parnok 9 apu. Delhi Police Special Cell nungi Anil Shukla-i, nisung 9 ket nungjagi Glock pistols, cartridges 25 aser Pakistan Ordnance Factory nung yangluba grenade pezü apu, ta metetdaksü. Parnok jagi Shahzad Bhatti network ajanga Pakistan nung ISI den tongtepratepa liasü aser tesem balala amaksü atema tetuyuba agüja liasü. Police-i ashiba agi, tai tonglokja alirtem jagi Mumbai aser Delhi na nung tesem aika ladanger liasü. Parnoki Mumbai nung apu aika ladanger liasü aser Delhi nungbo sorkar kiojen,

lokta aliba tesemtem aser sepaitem aliba tesemtem ladanger liasü. Police-i apuba nisung 9 ji Delhi, Maharashtra aser Punjab nungi lir. Anil Shukla-isa, Pune nung Vijay Shooter apu, Sahibganj nung Nitish Paswan apu, Mumbai nung Tauqeer aser Arbaz na apu, Delhi nung Harvinder aser Manjit na apu aser Delhi nungsa Nepali nung ka apu, ta metetdaksü. Bushisüdüngangertemi senotsü aruba lenmang, tongtepratepa records aser network balala bushisüdüngangdar, ta police-isa metetdaksü.

## UP nung tzünglu aser yipru lendong nung nisung 16 asü

**New Delhi, May 30 (Agencies):** Anogo ana tsüngda Uttar Pradesh nung tzünglu, yipru aser tsüngsang-mopung dak sendakba lendong balala nung nisung 16 süogo. Tzünglu sashia aruba den klemi yipru lendong ajanga Lucknow densema district aika nung süngdong lao, ki chirep, electric light indong lao, tsüngi ai aser tzi metsünga liasü. Tesüiba anogo ishika tsüngda tsüngsang-mopung ajanga tamajungtiba kongshibaji Bundelkhand region liasü; iba region nung nisung 10 asü. Sorkar ketdangsertemisa Raebareli, Ambedkarnagar,

Kaushambi, Pratapgarh, Azamgarh, Ballia, Bhadohi, Deoria, Agra, Mathura, Unnao aser Fatehpur district tem nung nisung asüba mesüra yiruba osang maneni bendendar. State Chief Minister Yogi Adityanath-i District Magistrates ajak dang kümzükba maparen aser teyari agütsüba maparen tekeraba nung inyakang, ta tuyuogo. Chief Minister-isa kiojen densema teraksatsüba balala asadangang aser takoksa anguba kibongtem nem tekeraba nung senotsü teyari agüjang, ta tuyuogo. Meteorological Department-i Honibarnüa

district 46 nung yipru mopung tesashi alitsü aser district 14 nung tzünglu sashia arutsü ta metetdakja liasü. State tesem aika nung tzünglu kanga aruogo; Mirzapur nung tzünglu 100 mm aruogo, Ayodhya nung 90 mm, Prayagraj nung 61 mm aser Unnao nung 59 mm aruogo. Iba dak alia tzünglu sashia aruba den yipru ajanga Sitapur, Badaun aser Jhansi nungbo alu nung aonsotsü jenti raksatsüogo. Ano külenbo, tzünglu kanga aruba ajanga tali tatsük aliba kanga süngjema kümogo. District aika nung maximum temperatures 8 degrees Celsius agi tajemba kümogo.



May 30, 2026 nü Shimla nung Panchayat elections tatembangbuba anogo nung vote agütsütsü atema tetsürtem tarensena nokdaka aliba noksa nung angur.

## Tatidang kata ochishia magiteter: Rahul Gandhi

**New Delhi, May 30 (Agencies):** Technical dak sendakba timtem ajanga linük tesem aika nung CUET-UG 2026 examination mapang talangka thinen, ta osang prokba sülen Lok Sabha nung Opposition lenir Rahul Gandhi-i, Centre sorkari tatidang kata ochishia magiteter, ta aitsü. Ato kilonser Narendra Modi aija Rahul-i, sorkari linük nung tongtibang tatidang balala junga ketdangsa magiteter, ta aitsü. Rahul Gandhi-i X ajanga, "NEET. CBSE. SSC. Aser tanü CUET. Tatidang pezü. Tanur crore ka. Tatidang ka danga ochishia magitet," ta metetdaksü. Paisa, "'Alima atema tesayur' tabo jembir, saka linük nung tatidang ka danga junga magiteter. Modi-i shisaliok inyakyim khenyongi raksatsüogo. Nai tarutsü atema raksatsüba lanurtem- kasa lanurtem jagi na aitsütsü," ta metetdaksü. National Testing Agency (NTA)-i technical tsütsü timtem adokba ajanga parnok indang technology partner, Tata Consultancy Services (TCS)-i

Honibarnü examination centres aika nung CUET-UG 2026 tatidang thinen, ta metetdaksü. NTA-isa, tesülen candidates nem mapang peria agüja tatidang agütsüdütsü, ta metetdaksü. Taoba mapang Delhi chief minister aser AAP national convenor Arvind Kejriwal-ia, NEET Questions paper belenshitsu atema Air Force tayimtsü amshitsu asoshi Centre-i telemtetba agiba ajanga paper leak asüba nokdangtettsü asü?, ta asüdüngang. AAP lenir Atishi-ia, "Mezüng NEET, iba sülen CBSE, tang CUET. Tanü technical timtem ajanga CUET tatidang menoa magi. Tanü India tesem balala nung kaketshir lakh aikati tatidang agütsütsü liasü. Ghonda aika ataba sülen centre kima notice agütsü," ta metetdaksü. 2022 küm tenzükba Common University Entrance Test (CUET-UG) ya central, state universities nung undergraduate programmes atema admission asoshi agiba standardised national-level entrance examination lir.



May 30, 2026 nü Bodh Gaya nung Bihar Angh, Syed Ata Hasnain-i Myanmar Tir, U Min Aung Hlaing agizükdang tangokba noksa nung angur. Myanmar Tiri anogo pongunü India semdangar.

## June 3 nü DK Shivakumar-i Karnataka nung CM tenangzükba agitsü

**New Delhi, May 30 (Agencies):** Karnataka Congress president aser deputy chief minister DK Shivakumar-i June 3 nü Chief Minister tenangzükba agitsü, ta Honibarnü Karnataka Congress working president, G C Chandrashekar-i metetdaksü. Bengaluru nung osangbenertem den jembidang Chandrashekar-i, tenangzükba agiba sentongji Glass House, Lok Bhavan nung agitsü, ta metetdaksü. Chandrashekar-isa, "June 3 nü DK Shivakumar-i CM tenangzükba agiba sülen pai nüburtem dang nungi temoatsü meshia district headquarters ajak sema senzütsü," ta metetdaksü. "Tenangzükba agiba sentongji kanga tongmelang asütsü. Iba sentong nung sen aika meindoki kanga tongmelang süa agitsü atema party-i telemtetba agiogo," ta pai metetdaksü. Honibarnü Shivakumar Congress Legislature Party lenir shimogo. Küm asem tejaklen Karnataka assembly election nung Congress-i takok anguba sülen Siddaramaiah-i CM tenangzükba agia liasü aser

party bangdak tetuyuba nung May 28 nü pai CM menden toktsüogo. State Angh, Thawar Chand Gehlot-i pai sodi meshibaji agizükogo aser Council of Ministers anentsüogo, ajisüaka sorkar tasenba maküm tashi CM inyaka alitsü pa dang asüdüngang. Hokolbarnü osangbenertem den jembidang Shivakumar-i, "Bengaluru nung nikongdang 4:00 ako nung Congress Legislature Party senden amentsü. Observers ana arutsü aser tena lia onoki CLP senden amentsü, iba sülen bangdak lenirtem den jembitepa parnoki telemtetba agitsü," ta metetdakja liasü. CLP senden nung Observers anaji KC Venugopal aser Randeep Singh Surjewala na liasü. CLP senden nungji chief minister menden toktsüsang Siddaramaiah-i CM menden atema Shivakumar tenung benok aser G. Parameshwara-ia agizüka liasü, iba sülen MLA ajaki melunga agizük. CLP lenir shimba sülen Shivakumar-i Raj Bhavan nung Angh ajurua sorkar akümtsü asüdüngangogo.



## TIR YIMYIM YIMOBILEM (EDITORIAL)

DIMAPUR SUNDAY, MAY (MONUPII) 31, 2026

### Temeshiba Iartem

**K**odang asenok temenen nisung liasü, idangji asenoki inyaknuba inyak masü saka temeneni inyakdaksünuba asenoki inyak ta asenok temulung meyipa sülen tali jangjaa metetter. Aji oda, asenok temenen nung ali tashi asenok temenen lar liasü. Tetezü asenok madak temenen kibur südaksünungji asenoki mulungba ama inyaksübaji asenok atema mapa kanga tasak liasü, kechiyong alari kiburi ashi angatsüla. Aji oda, asenoki yi mejemner saka ajemer, moko aser sali mechiner saka achir, nüktapangta mebenshiner saka benshir, tiyazü aser tangar anema mejembiner saka jembir, kechiyong itemji asen madak kibur temeneni mulungba mapatem lir. Anungji, asenok kibur temenen talenba nungi asenok mechiok tashi asenoki mulungba masü saka kiburi mulungba inyaksüsa akümer. Atangji, asenok meimchir taküm ya alima nung teti alitsüba aru masü, saka yangi ken lir külen teti alitsüba limajibo molumi mesüra kotak lir. Aji oda, asenok alima nung ken alidang kibur ka mesüra ka kübokbosa alitsübaji alima yimya dak keta lir, kechiyong teti alitsüba alima ana nungjia kibur kaka lir aser asenok alima nung alidang kibur ana rongnungji koba kübok asenok alarsa lidir, iba kasa kibur meyong lima nungji oagia asenok alarsa alitsü. Tanü asenok alima nung alidang asenok teti alitsüba limaji penzüa asenok madak kibur asütsü raktepba kibur ana, ka temeshi aser ka temenen, ana rongnungji ka shima tenzüksüla. Ibayongji, Laishibai ashir, " Nenoki tashi angaa shiba nem peisasa alartem ama bendanga agütsür, oda tasüba dangi anisang temenen süshia mesüra temeshiba dangi anisang dang tashi angatsü süshia, nenoki shiba dang tashi angar pa purtem nenok lir." Rom 6:16. Tetezü asenok alima nung alidang alarbo alar amasa asütsü, saka asenok jangratema alitsüba malitsüba aser teti tepeladak alitsüba malitsübaji kibur dakji dang keta lir, kechiyong asenokbo alar asünungji kiburi kechi shidir ibaji dang inyaksü. Anungji, Laishibai ashir, asenok taküm madak temenen kibur mesüdaksütsü aser asenok temenen lar masütsü asoshi Yisu Khristai pei taküm bendang agütsü, anungji tangbo asenok temenen lar masü saka temeshiba lar lir. Aji oda, Laishibaisa yamai ashir, " ... Tsüngrem nem tenüngsang agüjang, kechiyong nenok temenen Iartem liasü, saka nenoki temulung ajak agi nenok nem agütsüba tesayuba nung tashi anga aser temenen nungi nüji kümer külen, nenok temeshi Iartem küma lir." Rom 16-17-18. Anungji, joko asenok temenen lar masü saka temeshiba lar asünungji, temeshibai kechi shidir aji inyaker. Aji oda, joko asenok temenen talenba nungi salarbo asenok madak kibur kata mali ama asenok inyaknüsü inyaksü aers jembinüsü jembitsü ta masü saka ano asenok madak temeshiba kibur lir, anungji asenokji temeshiba lar asütsü. Aji oda, asenokibo temenen mapa inyaknua alitsüa akok saka asen kibur temeshibai memelar anungji asenoki meinyaker. Asenok temenen nung alidang kechi koda asenoki temeneni mulungba inyak yamaji asenok taküm nung Yisu Khrista kibur kümdaksür sülenbo temeshibai mulungba ama inyaksübaji asenok mapa lir. Atangji, Khristan kümer külenbo temeshi alitsübaji asenoki linüra alitsü aser melinüra malitsü ta masü saka alitsüla. Temenen talenba nungi salar asenok Khrista nung nüji akümbaji asenok inyaknüsü inyaksüba nüjiso masü saka tanüla temeshi nem asenok anidaksütsü aser Tsüngremi mulungba inyaksübaji asenok mapa lir. Aji oda, asenok temenen nung alidang kechi koda asenok temenen lar kümer ali, yamaji asenok temeshi nung alidanga temeshi lar kümer alitsübaji Tsüngremi mulungba lir. Yimten nüjiso akaba lima nunga senso ka pei linütsü malir saka linük temzüng ozüng kübok alir, aji oda kodang asenok temenen talenba nungi Tsüngrem taochi agi kümzü, iba mapang nung jagi asenok taochi kübok temeshi lar kümer Tsüngremi mulungba nung jajar. Iba tajangzükji teti taküm angutsü saka temenen lar asüba taabo tasüba angutsüba liasü. (Rom 6 : 22-23).

## OLEMSABANG

### WORLD NO TOBACCO DAY(2026)

~ Dr. I. Simon Sumi, State Nodal Officer ,  
National Tobacco Programme

Kümshi 31st May anogo ya alima ajanga nung WORLD NO TOBACCO DAY ta alakteta shimteta Sali moko achiba ajanga tashidak palala adokba indang tekümdangtsü, aser item tashidaktem nungi koda kümzüka alitsü, nürburtem nüm tesayuba palala agüja, Health Department den teka amteper Arogo, mungdang aser lokti tentet palalai shilem agia item temesepa chiyungtsü nungi pila-a alitsü ajungshitepa alima rangben nung amongba tongtipang anogo ka lir.

Moka Sali achiba ajanga tashidak adoker aser iba ajanga taküm aika anojungi asür ta metetaka aikati mazüokteti oda achir. India kisung nung nisung 1.35 Millon moko achiba ajanga adokba tashidaktem palala agi kümshi asür. Global Adult Tobacco Survey(GATS) 2016 ajanga bushitetba agi Nagaland nung taintem 43.3% moko Sali achir. Global Youth Survey 2019 nungbo school tanurtem arishi küm 13-15 tsüngda tebuchau tem parnok 62% aser tetsür chanu 24% moko achirtem lir. India rangben nung lanurtem moko achirtem linüktem rongnung asen Nagaland State ya tanabuba jenjang nung lir.

Moko ajanga temang nung tenüktelen ajak nung kongshir kechiba süra Cancer adokdaksüba meim mozü (Chemical) tapu palala 7000 shi moko nung dena lir. Koba ajanga asen temang tenüktelen palala nung talisa Temeli, tebang, Tepunü, terok, tebokpok, temesen, tezüngjang Etc nung Cancer adokdaksür.

Taküm (2026) WNTD anogo ya "Unmasking the Appeal-Countering Nicotine and Tobacco Addiction" Omen nung ajemdaker alima rangben nung sentong tapu palala yanglua amonger. Omen nükjidongji tanü lima lanurtem mesüzüksü atema Tobacco Companytemi chiyungtsü tanang nung moko aser Nicotine inoka yanglur tenükshitsüka aleper (Colourful packing) lanurtem aika temesepba chiyungtsü achitsü yima sübadaksür. Tatitshitsü agi. E-Cigarettes, Signatures, Talap, Rajnigandha, Shikar, Tulsi Jarda, Raja, Kaka Sada Etc. Social Media sapang palala nung item chiyungtsütem achiba ya alima ainba den tsüngkang medema aoba den liro medema aoba temaitsü (Fashionable & modern) ka amai lanurtem aika ashiokja chibadak-ja jokor medoksüteti takümji alena atoker (Addiction). Aji oda Tobacco Companytemi pei ajangzüksü tasa palala purapiteta, lanurtem atsüa arutsü merangteper. Item chiyungtsütem nung ya kecha mim mozü mali amai kanga tepur junga repringaka (Harmless and Trendy) item nung ya Nicotine inoksema yanglur koba ajanga lema lema temang shilem palala nung aneptsü makokba tashidak aika adoka lanurtem aika nükjidong metongtetba dang masü anojungi arishia atemer. Nagaland nung Tobacco Industry mali anungji tanga State UP, Andhra Pradesh, Gujarat, Uttar Pradesh, Karnataka ama states-tem nungi belena sen Lakh sa Lakh indoka alir arua yoka Naga nunger lanurtem 43% moko lar kümdaksür.

Moko lu yima shishilemba mapa ya India nung rongsenketsüng (Government Revenue Annually 14,000 Crore) arulen tongti sanen ka lir, tipkelen moko lu nung inyaka India nung nütsüng 45.7 Millon pei kibong mesüa taküm metaloka alir. Anungji Sali moko ya tenokdangba arla kar dak alaka ozüngi mela-a shishilembar. (Temzüng arla tatishitsü kar:- Lokti alidak kecha nunga moko machitsü, tanur küm 18 kübok dang mayoktsü, School aser Teaching Institution anasa Meter 300 tasazük nung moko Dokan melapokdaksütsü) Etc. Item arla nung aibelenertem kar bo senchi dang masü Pataki (Jail) tashi oa merenshidaki. Aji oda süaka pei temang aser kibong asoshi tajung majung shimtetsüji pei molung.

Tongtipangsa taküm WNTD omen ya lanurtem dang rangloker ayongzüka amonger. Kechiba süra Tobacco Industry temi tasa palala amshia Nicotine inoksema chiyungtsü tajung amai yanglur tanurtem aika iba lar kümdakja parnok takar akümtsü sentong nung inyaker, ya mita atatsü aser pila-a alitsü tesayuba inyakyim palala agüja amonger.

Moko Sali lar (Nicotine Addict) kümer alirtemi temolungtetba dang lira indoktetsü takoktsü lenmang aika lir. Peisasa azüoka, Exercise agiba, aounung yakta mejangba aser anepdang yakta sakba aser chiyungti nungi pila-a aliba den Counselling agütsüba den mozü angati agüja yaritsü Nagaland nunga District Hospital-tem ajak nung aser CIHSR (Referral Hospital Dimapur) Tranning teperi agir teyarier tem Sorkar-i tokja lir. Anungji teyari nungdakertem peisasa aser kinungertemia ajungshia yangji oa Treatment agitsü merangangma.

Taoba küm ter metsü tsüngda tapayutsütsüka lanur tajung aika mozü agi taküm raksa raksa-a kibong tebilemtsü dang masü alima ajak khuret küma asen chirtem aoyi akümba jenjang to bilemteta Tobacco anema senso ajaki rarati ta ayongzüker.

## AOR KHRISTANTEM APUSUANG

~ M. Meren, Ex. Pastor.

(Yashi adok nungi...)

Saka ano telung nung alirtem arishidang tema nung alirtemang khuret tulu ajurua aodang 1964 küm Wokha Town nung NBCC Mungdang tulu sentep. Idangji Mungdang aser Arogo lenirtemi anir alima tia yagi matemtsü aser Naga nunger teküp-tesü agi matitsü aser oda oda Naga lima ya samatsü aser aji India nunger nükjidong lir, anungji, telung nung alirtem o India nunger na tsüngta yimjung lapoktsü bushidi ta sür tashi ajak agi meranga Peace Mission nisung asem shimteta yutsüba parnok den NBCC lenir aser ABAM tenzüker lungjumer meranga inyakba ajanga iba kümjisa India nunger o Naga nunger telung nung alir na tsüngta 1964 Sept 6 nung yimjung lapoka tanü tashi iba yimjung nungji asenok lia aor. Asen jakdang aliba Arogo lenirtemi yamaji mapa tajung tasü itta inyakba ajanga tanü asenok yimjung nung lidaksür.

(Maneni asüng adk nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# COICOM-i Guatemala nung 2026 continental congress tenzük



May 26, 2026 nü Guatemala nung COICOM Plus Guatemala 2026 sentong nung COICOM international executive Tir, Dr. Arnold Enns-i jembidang tangokba noksa nung angur.

**May 30, 2026:** Latin America nung nung kanga tongtibang sentong ka atema renemshia May 26, 2026 nü Khristan lenirtem aser pastor tem aika Guatemala nung aliba Barceló Hotel nung adenshia COICOM Plus Guatemala 2026 tenzükogo.

Ibero-American Confederation of Christian Communicators and Media (COICOM)-i taruba International congress ya Guatemala nung November 9-11 anogotem nung ayonga agitsü.

Küm 22 tejaklen Guatemala nung COICOM International

Congress ayongzüka agia liasü. Tang Latin America nung aliba Arogotem nung tayongzükba jenti aliba mapang ka nung iba sentong ayongzüka agitsü.

2026 continental congress tenzükba sentong nung jembidang COICOM international executive Tir, Dr. Arnold Enns-i Guatemala nung taoba mapang sentong balala agia aruba metetdaksü.

Dr. Enns-i, "Küm 22 tejaklen onoki yangi Guatemala nung COICOM congress ayongzüka liasü. 2004 küm Grand Tikal Futura nung COICOM congress

ayongzüka agi. Iba jakdang 2000 küm yangi Guatemala nung mezüngbuba COICOM congress ayongzüka liasü," ta metetdaksü.

Iba sentong ya COICOM board chairman, Dr. Mynor Vargas leniba nung agi.

Sentong ayongzükertemi ashiba agi, Latin America nung loktiliba aser tanela tsütsü tayongzükba aika aliba mapang nung iba sentong agitsü.

November ita nung agitsü aliba sentong atema local Arogotem aser ministry lenirtem tsünga amalitepa inyaksü nüngdak, ta Dr. Enns-i ashi.

"COICOM congress ayongzüka agitsü atema asenoki yimti kikümbang aser linük kikümbang adena aotsü nüngdaker. Linük kikümbangji pastor tem aser lenirtemi anüker," ta pai ashi.

Taküm COICOM congress atema omenji "Mangdang Tejangja" lir.

COICOM Plus Guatemala 2026 sentong nung report kar lemsatepa liasü. Tenla kidangi maoer shilem 74-ibo Arogo ajanga loktiliba asoshi tajangzük kecha magütsür ta bilemer aser shilem 34-i tanü putu nung Arogoji tapet masü ta bilemer.

November ita nung ayongzükba sentong nungji linük nung temelenshi, Kibubai tenyaba wadang tulutiba aser lanurtem atema ministry mapa nung rangloker jembitsü.

November ita nung ayongzükba congress nung tongti onük pezüji- Khristan tesayuba tamendakdaki meyipba, putu balala nung asortem tsünga lenisüba melentepba, digital tools aser AI amshitsü atema Arogotem ajungshitsü aser tatembangbuba onükji pastor tem, communicators, business

lenirtem aser lokti tentettem tsünga amalitepa inyaksü asoshi.

Dr. Enns-i, "Asenok matsüngdang tayongzükba tulu lir. Latin America nung nütsüng shilem 65 bo arrshi küm 35 ser tekübokpurtem lir. Ajisüaka Latin America nung evangelical lenirtem shilem 70 bo arrshi küm 45 ser temapurtem lir," ta metetdaksü.

Iba sentong nung jembidang Hope of Life International director, missionary Carlos Vargas-i, loktiliba mapa aser temeim mapa inyaksü atema lanur lenirtem kanga tetemsüba, ta ashi.

Vargas-i, "Asenoki temeim atema kanga jembir saka asenoki iba atemaji kechi inyaker? Temeim atema jembibaji o dang kümdaksür. Asenoki ki telung nung temeim atema jembir, saka ki adener asenoki kechi inyaker?" ta asüngdang.

May 26 nü COICOM Plus Guatemala 2026 tenzükba sülen Diario Cristiano Internacional director aser COICOM board nung züngsem, Javier Bolaños leniba nung osangbenertem den jembia liasü.

## ANOGO ABEN TSÜNGREM DEN

### TEMESHIBA SOBUTSÜ SOBUANG

"Tenlaba dang nungi temeshiba aser ochiba inyaksü, Kibuba tsüngdang tali agizüktettsüsa lir" A.shin 21:3

Meimchir ka asoshi taküm nung anogo shia nüngdakbaji züngerera mezüngma lir. Item rongnung sobusolemtsü ya kanga tongtibang rongnung ka ta asenoki angateter, yagi tsük-temokong nungi kümdanger, temang miimbanga yua tatsük-temokong tashitak balala nungi kümzüka yutsür aser iba den temang nung tereprangtsü tobur jungdakja kümdaksüba shilem ka lir.

Tamanger tajung ka atema pa/la tamang aser tanela jenjang nung tashi ita aser tobur junga alitsü asoshi tanelar sobutsü sobua aliba ajanga dang temenen tongpang aser temeshiba tongpang anapronglaji kokteta litettsü.

Yangi agüja aliba Lai o nungji Tsüngremi Pa dang tenlaba magizüker ta masü, saka amangbapur ka asoshi iba dang nungi taküm nung "temeshiba aser ochiba" sobutsü sobua alibaji kanga tajung aser jangratemtsü lir.

Mathi 6:33 nung "Saka tamasa Tsüngrem yimli aser pa temeshiba bushiang, tetezü: 'Tsüngremer ochiba yimli aser pa temeshiba sobuang', aser item ajak nenok nem bendenloktsütsü, tetezü: temenenba aser temeshiba tongpang rara ajak kokteta ochiba nung tanela takümüji tobur junga sobur noktakba ajanga Pa tsüngdang tagizüktettsüsa kümdaksür. Ibalala temeshiba aser ochiba nung asen taküm teti jajatsü Kibuba nungi tashi meshidi.

#### SARASADEM:

Oh Tsüngrem, iba akümüli nung tamanger tajung ka ama temeshiba aser ochiba taküm ka süa alitsü meranga benshidi Na yariang. Amen

## Iran nung Khristan tetsür ka küm 9 ser ita 8 tepuokdak ayutsü



Ghazal Marzban

**May 30, 2026:** Iran nung Islam yimsü toktsür Khristan yimsü agizüker tetsür ka küm 9 ser ita 8 tepuokdak ayutsü obendang agütsüogo.

Taküm January ita nung la kidangi meyipa aoba mapang nung la ket nungi Laishiba ka aser Khristan kakettertem apu. Iba sülen lai linük security anema inyakogo aser sorkar anema inyakogo ta la nem tai tonglokja liasü.

Revolutionary Court Judge Iman Afshari-i ken o angadanga sülen Ghazal Marzban aija la küm 9 tepuokdak ayutsü obendang agütsü, ta melungtet telok Article18-i metetdaksü.

January ita nung Iran yimtiba, Tehran nung Marzban lar kidang lia apu. La ket nungi Laishiba aser Khristan kakettertem-a aika apuba sülen la mejangjaba tesem kati anir oa liasü.

La apuba sülen ghonda

ana shi lir lai la kinüngbu aja. La Ministry of Intelligence detention center nung puoka liasü. Iba sülen ita ka shi lirbo lar kinüngertemi la den tongtepratep mesüteti liasü.

Asüngdangyaba mapang nung Marzban dang, Laishiba aser Khristan kakettertemji tangartem den Khristan yimsü lemsateptsü atema lir, ta kangshia la nem nangzükdaksütsü merang, ajisüaka lai menanzük.

"Laishiba aser Khristan kakettertemji ni amshitsü atema dang lir aser Khristan ka ama itemji kü ket nung alitsü kü dak temeden lir," ta lai langzüa liasü.

2024 küm nunga lai sorkar anema yimiyim ayim, ta la nem tai tonglokja la ita ana Evin Jail nung puoka liasü.

Marzban ya Islamic law graduate ka lir saka küm 9 tejaklen lai Khristan yimsü agizük, ibayongji la nem bar

exam magütsüdaktsü aser Iran toktsür aotsü atema la rongshia liasü.

La kinüngbu-a Islam yimsü toktsür Khristan yimsü agizüker ka lir.

Article18 executive director, Mansour Borji-i, Marzban küm 9 tepuokdak ayutsü obendang agütsübaji la kinüngbu tenaprong anema obendang lir, kechiyong medical teyari atema la kinüngbui la kanga nüngdaker, ta metetdaksü.

Ita ishika tejaklen Iran nung nüburtemi sorkar anema longkak aitba mapang nung Khristan 22 densema nisung meyirjang aika tepseta liasü.

Iran nung ketdangsertemi yimsü temeden nokdang aser aibelenertem pua jail nung puoker; talisa Islam yimsü toktsür Khristan yimsü agizükertem kanga reshikangshir.

Yaküm December ita nunga Iran nung Khristan pongu tepuokdak küm aika ayutsü atema obendang agüja liasü. Sarasademba, baptiba aser Laishiba lema agütsüba ken otem nung aija parnok tepuokdak ayutsü obendang agütsü.

Yaküm December 28 nungi tenzüka Iran nung nüburtemi yimsüsürtem anema longkak aitba mapang nung sorkari tashiyim amshia nisung 7,000 dak tali tepsetogo.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yimden**

(n) yim ka nung senso ajak dena aliba yimsüsüba menden (political authority,)

\* Yimtak yimdeni tashi manger dang temerenshi ak achir.

**Yimdong**

(n) yim tiyong nung nisungtem senzüba lenmang (street)

\* Yim ajak nung yimdong sademsadema alitsüla.

**OLONG PAITEP # 7520**

	1	2		3	4	5
6					7	
				8	9	
		10				
11						
			12			
13	14	15				16
17					18	

**TIPIEN**

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S \_\_\_\_\_
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

**LANGTSÜNGLEN**

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. \_\_\_ hi
- 16. Akümüli nungi pilar

**OLONG PAITEP # 7519 TELANGZÜBA**

**TIPIEN :**

- 1. Chisang, 4. Ket, 7. Odi, 8. Nangri,
- 10. Angur,, 11. Aiben, 17. Temeim
- 18. Lah, 19. Moa, 20. Takdang.

**LANGTSÜNGLEN :**

- 2. Indang, 3. Nüngo, 5. Tain,
- 6. Ana, 9. Ama, 12. Balala, 13. Nao,
- 14. Sempa, 15. Atem, 16. Ken.

**NAI-A YA METETTER**



Electronics manufacturer Anker indang audio brand Soundcore nem Guinness World Record agütsüogo aser iba ya "highest speech quality score" atema lir. Independent laboratory ka ajanga Soundcore ajanga yangluba Liberty 5 Pro aser Liberty 5 Pro Max headphones tendangba sülen iba naroküm agütsüogo. Liberty 5 Pro earbuds nung "Whisper Clear call" feature keta lir aser iba nung microphones 8, 10-sensor matrix aser neural network processing amshia o jembir ola balaka jangjajangjaa kümdaktsür.

Anker-i ashiba agi item earbuds nung Thus AI chip ta ser mezüngbuba on-board AI hardware enoka lir aser iba ajanga Liberty 4 Pro earbuds dang nungi computing power 150x agi teimba lir.

**Jalukbari nung railway eviction drive mapang ki 200 raksatsü**



**Guwahati, May 30, 2026**

**(Agencies):** Railway Department-i railway ali atsünga agirtem anema eviction drive agidang Guwahati kübok Jalukbari area nung Hokolbarnü ki 200 shi raksatsüogo.

Iba mapa ya Assam Police, RPF, CRPF, aser executive magistrates dena inyak. Railway Department-i railway infrastructure ulushitsü sentong nung iba clearance drive ya

shilemka lir. Tesüba küm ishika tsüngda eviction drives aiben agüjaka Jalukbari anasa lendenlen ozünga alema nisungtem alir ta ketsdangsürtemi ashi.

Tanü raksaa endoktsüba teimbaka temporary shelters liasü aser nisung karibo units aika yanglur para agia lidaktsü ta ketsdangsürtemisa ashi.

Iba ali ya Railways meyong lir aser tang teinyakdak

infrastructure maparen atema nungdaker ta railway ketsdangsür kati ashi.

Iba nung kibong 200 shi liyonga aru aser parnok aika küm pungu nungi trok tashi alir ta ashir.

Iba tesem nungi nisung ajak memeindok tashi clearance drive alitsü aser tarutsü nung atsünga agiba noktangtsü ta Railway ketsdangsürtemisa metetdaktsüogo.

**Kokrajhar nung tanur ana asüba atema temeten meshir**

**Guwahati, May 30, 2026**

**(Agencies):** Assam kübok Kokrajhar district nung school tanur ana taitüsü keta asüba atema temeten meshia All Assam Adivasi Students' Association (AASA)-i May 29, 2026 nü candlelight rally ka ayonga agiogo.

Dholmara nung kaketshirtem, nübortem aser telok balala nungi züngsemtemi candles amer Anamika Bara aser Sarita

Lakra na asüba atema timi bushisüngdang asütsü takhangba agütsüogo.

Kaketshir ana indang tasü mang ya May 21 nü Dholmara nung awatsüng ka nung taitüsü keta angu.

Tena mang anguba sülen kinungertem aser kiyongertemi tzü nung arakset ta asüba magizüker aser tena ya nisung kari tepset asütsü akok ta tai tongloktsür.

AASA-i ayongzükba

sentong nung adenertemi ochi metettsü aser tasür kibongtem nem temeten agütsütsü atema timi bushisüngdang asütsü takhangba agütsüogo.

Külen, Assam sorkari tasür kaketshir kibong shia nem Rs 2 lakh senotsü teyari agütsütsü metetdaktsüogo.

Tasür kibongtemi temeten mangu tashi onoki ozüngi melaba ama lungkak aitba manentsü ta AASA president Gudwin Hembrom-i ashi.

**Tinsukia nung ULFA-I nung adentsüpur 3 apu**



**Dibrugarh, May 30, 2026**

**(Agencies):** Assam nung lanur asem United Liberation Front of Asom-Independent (ULFA-I) nung adentsü merangdang Lekhapani Police-i apu.

Par asem ya ULFA-I nung adentsü atema aodang Tinsukia district nung apu.

Parnok ya Antu Moran (34), Bijoy Moran (28) aser Newton Moran (22) nunger ta jangjaogo aser par asemprong Tinsukia kübok Pengeri Police Station area nung alirtem dang lir.

"ULFA-I-i iba arrtsülen aliba district nungi lanurtem anioiktsü

kanga meranger aser tashiyim agi sen sarur. Iba recruitment chain atema bushisüngdang südar" ta police ketsdangsür kati ashi.

Tinsukia ya Arunachal Pradesh den arrtsütepa lir aser mapang talangka ULFA-I senzüsenbongba corridor tongti ka ama lir. Parnoki iba tesem nungi züngsem tasentem Myanmar teseptemi anir aoer.

ULFA-I ajanga meta talang pilar aliba yimtsüngtem nung aliba sensaker lanurtem mesüzüktsü meranger ta security agencies-i tesüba nung

metetdaktsüogo. Lanur asem apuba sülen security forces-i Tinsukia aser temekettem nung maparen ulushia inyaktsü tenzükogo.

"ULFA-I-i Tinsukia district nung lanurtem dak miima tenük yoker. Parnok Over Ground Workers (OGWs) ajanga lanurtem dang ULFA nung adentsü tangatetba agütsür" ta osang ka ajanga ashi.

Tawa tu security forces-i ULFA-I züngsem aika temai adoktsü nung yaritepogo. ULFA-I züngsem aika temai adoktsü aser akhümketa lidar.

# Ukraine-i drone amshia Russia indang oil facility tem amak



Ukraine-i Russia kübok tesem balala nung drone amshia energy infrastructure raksatsüogo.

**Moscow, Monupii/May 30 (Agencies):** Ukraine-i Russia kübok tesem balala nung drone amshia energy infrastructure tem makogo.

Tesem balala amakba rongnung tamajungtiba kongshiba tesemji Taganrog, Rostov Oblast liasü, kong drone tem agi tanker ka, totsü ayuba tank ka aser administrative building ka amakba sülen mi adoka liasü, ta Russia indang RIA Novosti state media agency-i metetdaksü.

Honibar anepdang Rostov Governor Yury Slyusar-i iba tesem amakba ya Russia indang state-meyong messaging app max ajanga metetdakja liasü.

"Drone agi amakba sülen Taganrog rongnendak tanker ka, totzü ayuba tank ka aser administrative building ka nung mi adok," ta Slyusar-i zülutsü. "Osang ajanga ashiba agi, nisung asübabo osangbo kecha mali. Ken o tang jangjashidar."

Kasa mapang nung Taganrog nung drone agi nisung aliba ki ka amakba sülen civilian ana yiruogo. "Anüng ajanga Taganrog amakba sülen ano tanga civilian ana yiruogo," ta Slyusar-i ashi. "Osang ajanga ashiba agi, drone kati nisung aliba ki ka amakba sülen nisung ana yirua liasü. Medic temi teyari agütsüdar aser tenüngdakba mapa ajak ketdangsia inyakdar," ta paisa shisem.

Slyusar-isa, Russia indang air defence temi manger mesangwa tsüngda district pezü nung drone aika raksatsüogo, ta shisem. "Rostov tesem anüng

ajanga amakba mapang Taganrog, Chertkovsky, Matveyevo-Kurgansky, aser Neklinovsky district tem nung UAV tem raksatsüogo," ta pai ashiba RIA Novosti sangdong ka ajanga metetdaksü.

Drone ka agi amakba sülen Grekovo-Timofeyevka yimtsüng nung gas pipe ka aser ki ka nung mi adoka liasü. Iba kidang alirtem aninogo aser nisung asüba osang kecha mali. "Neklinovsky District kübok Botsmanovo tesem nung ki ana nung kichiba raksa liasü. Lendong nung nisungbo shinga miyiru," ta Slyusar-i shisem.

Maneni Armavir, Krasnodar Krai nunga oil facility ka dak kongshi aser Yaroslavl anasa totsü ayuba tank tulutem rong liasü. Drone agi amakba sülen Russia indang Volgograd oil refinery shibanga ayutsüsa aküm, ta ashi.

Ita ishika tsüngda Taganrog ya aiben maka arudar. 2026 küm March ita tatemlen drone kati yimti amakba sülen nisung ka asü aser tangar ti yirua liasü, ta ketdangsürtemi ashi.

Kasa mapang nung Russia, Ukraine dak drone 90 aser ballistic missiles (Iskander-M/KN-23) ana khaloktsüogo.

Zaporizhzhia nung energy infrastructure raksatsüba sülen yimti nung alir nisung 13,000 electricity makai aküm.

Sumy tesem nunga infrastructure, ki aser garitem raksatsüogo, ta Ukraine nung local media sangdong balala ajanga metetdaksü

Ukraine tir Volodymyr Zelenskyy-i Hokolbarnü, Ukraine kanga sashia amaksü

atema Russia renemdar ta tekümdangtsü metetdaksü.

"Itangiertemi Ukraine kanga sashia amaksü atema Russia renemdar ta shiogo. Onok indang service temi kanga kara jenjang agidar aser renema lir," ta Zelenskyy-i Telegram ajanga ashi. Paisa, Ukraine nungertem dang pei taküm kümzüka ayutsü mepeshiba den parnok nem teyari agütsürtem dang takaratiba nung Patriot missile system agütsütsü mepeshia metetdaksüogo.

Russia-i, defence infrastructure tem amaksü atema sentong yangludat ta shia bendangertem dang Kyiv toksür aotsü asoshi tekümdangtsü metetdaksüba sülen iba ya atalokogo. Russia-i ashiba agi item infrastructure tem ya Ukraine yimtiba meketa amenoka lir.

Hokolbarnü ano Russia indang drone ka Romania anütoklen nisung aliba ki ka nung chiokba sülen nisung ana yiruogo, aser iba ajanga Moscow aser NATO na tsüngda tensa tamajungba kümdaksüogo.

Ukraine aser Russia na yimjung atema sensaksem bangdaker aliba mapang linük ana kati ka indang energy infrastructure tem tali maktepa arudar.

US teyongtsüi ia yimjung atema sensaksemdar, saka US-Israel nati Iran amakba tenzüka sülen ken o bangdaka lir.

Taoba mapang-a yimjung atema sensaksemogo, ajisüaka kati ka takhangba magizüktepa sülen ken o tembanga sensaksem mesüet.

## AONOKPU KÜBZAR KIDONG TELONGJEM

Aonokpu : Nagaland

### SANGDONGER

Aonokpu Kübzar (Longchar) tebou pezü Semchirtem, Süngponungi Shir Puti tashi April 30, 2026 nung Atu Yimrong, Aonokpu yimdak inti senden ka amen. Aser senden nung Putirtemi tetsü tebou nokbangnubang mapang nungi teputep nung, kati ka taoba ta züngshitepa, khu tongzüktepa, yaritepa aser temeim nung lia aruba senti otsü tajungtem ashiba den, küsa temeim nung shilujungtepa akangshir lia aotsü sayu bentsü otem ashi.

Iba Aonokpu Kübzar tebou pezü semchirtem sentepba senden nung shisatsü lemsatepba shisamolul onlong nung ajemdaker bangzüng ka yamai renem. "Tanü nungi Aonokpu Kübzar Tebou Pezü Semchirtem tetsü tebou liyonga aruba obangtem nung ajemdaker nokbang, obang ka dang sür teti meimtepa alitsü ta bangjema tepong langshir."

Aonokpu Baptist Arogo Sannükeri anir amangbapur tajungtemi sarasadema ataba ama sayatonya nung iba sentong agiba April 30, 2026 anepdang mepet aser tzsü ajak senshidaksür anü sangwa yalokja, tsüngsang mopung tajung moatsür sentong tajung ka takokba nung katetdaksüba asoshi Tsüngrem tenüng kanga asanger.

*Asez*  
(T. NÜNGSENTIBA)  
Mendenbuba

*L. Yangerlemba*  
(L. YANGERLEMBA)  
Tezuluba

## Teküzmükertemi Laos nung longpok ka nungi nisung 4 anitetogo



**Bangkok, Monupii/May 30**

**(Agencies):** Teküzmükertemi Laos nung tzi agi metsünger aliba longpok ka nungi Honibarnü nisung pezü anitetogo, ta Thai nung volunteer teküzmükertemi ashi. Hokolbarnü iba longpok nungi nisung ka aniteta liasü.

Xaisomboun province nung hon bushia iba longpok yagi Laos nung parnok tenet aiba rongnung tang pongu kümzüker alirtem ta densema liasü. Ajisüaka tzi agi iba longpok metsüngba sülen parnok ya hopta ka dak tema sabanger liasü. Nisung ana tang tashi monguteti lir.

Iba mission nung densema aliba Thai nung cave diver Kengkard Bongkawong-i Facebook post ka ajanga Honibarnü ashiba agi, longpok nung sabanga alir parnok pezüprongla anitetogo.

Volunteer temi lemsatepba Video footage nung teküzmükertemi Laos nung

pezü parnok kolak nung flashlight alenoker süoshi ajak leshe agi mezübanger anir adokba nguogo.

Item nisungtem tejak nung tepela aliba aser parnok rongnung karbo anisüngzüka ajanga ajepba nguogo.

Parnok pongu ya teküzmükertemi Bodhbarnü angu, saka madokteti liasü. Ketdangsürtemi ashiba agi, samar alir ana ya parnoki maneni bushitsü.

Iba teküzmükba maparen nung kidanger Thailand nungia volunteer team ka taoba Honibarnü adenba sülen Finland, France, Indonesia, Malaysia, Japan aser ?Australia nungia diver tem iba inyakyim nung densema liasü.

International rescue team nung 2018 küm northern Thailand kübok Tham Luang nung longpok ka metsüngba sülen anogo 17 tashi teküzmükba maparen benoka inyakba nunga shilem agira kar densema liasü, ta osang ajanga metetdaksü.

## Tenangzüktepa meyanglutetra Iran amaksü US renema lir: Pete

**Singapore, Monupii/May 30 (Agencies):** Tenangzüktepa ka meyanglutetra Iran amaksü atema US renema lir, ta Defense Secretary Pete Hegseth-i Honibarnü ashi. Washington aser Tehran nungi yimjung atema sensaksemertem mangatettep aliba bentettsü merangba mapang tang Hegseth-i iba olen ya lemsatepogo.

"Rara tenzükshtsü asoshi onok dak maneni tashi lir," ta

Hegseth-i Singapore nung ashi. "Onok prangbong injang aser hadirtem iba rara atema aser alima nung tesem mashi ka atema tapet peria lir, anungji onok jenjang kanga junga lir," ta pai shisem.

Defence lenirtem, military aser diplomat tem atema Asia nung temaba senden; Shangri-La Dialogue nung jembiba mapang Hegseth-i, Iran den rara nung mazüngi liaka Asia-Pacific

tesem nungi US tejak memetip lir, ta ashi.

"Onoki mapang ka nung mapa ana inyaktettsü. Onoki onok defence industry akangshidar, aser alima ajunga nung onok sentongtem jungjunga yaritettsü atema onoki 2X, 3X, 4X munitions yangkludat," ta pai ashi.

Pentagon tekolakbai ashiba agi, tir Donald Trump-i kanga atasa inyakdar aser pai Iran nem nuclear

weapon meyangludaksütsü atema tenangzüktepa tajung ka yangluner.

Hokolbarnü Trump-i ashiba agi, Iran den rara tembangtsü atema tatembangbuba telemtetba ka agitsü asoshi White House takdang ka nung senden ka amentsü. Iba ajanga April ita tetenzüklen rara anena atatsü asoshi tenangzüktepa yanglur aliba ya anogo 60 tashi atsülangtsü aser iba ajanga

yimjung atema sensaksemertem nem teti atema mangatettep tembangdaksütsü asoshi tenangzüktepa ka yanglutsü atema mapang agütsütsü.

February 28 nü nungi US aser Israel nati Iran amak tenzüka sülen talisa Iran aser Lebanon nung nisung meyirejang aika tepsetogo, aser Iran-i Strait of Hormuz nokdanga ayuba ajanga alima ajunga nung totzü aser gas jenjang tali küma timtemtepar.

## Singapore Open: Satwik-Chirag na final-i iogo



**Monupii/May 30, 2026 (Agencies):** India nunger tebur tarep asayar Satwiksairaj Rankireddy aser Chirag Shetty nati Honibarnü Singapore Open tebur tarep asaya nung top seeds Kim Won Ho aser Seo Seung Jae na semifinal nung koka final-i iogo.

Iba asaya nung tamakok mangu tsungda Kim aser Seo na asaya 34 tashi khen danga tamakok mongui asaya liasü.

Satwik-Chirag nati world champion tarep Kim aser Seo na ya 21-19, 21-18 agi minute 52 nung koka liasü.

Kasa mapang nung India nunger tarep temeyoktep asayar Dhruv Kapila aser Tanisha Crasto na tang asaya aliba Singapore Open nung semifinals tongogo. Malaysia nunger asayar Toh Ee Wei temekok yirua masayatetsüsa akümba sülen tenati asaya koka liasü.

Japa nunger tarep Yuta Watanabe aser Maya Taguchi na den game asem tashi kanga toktepa asayaba sülen Dhruv aser Tanisha nati third-seeded tarep Toh aser Chen Tang Jie na akoktsü kanga timlabo maliasü.

Asaya tom tashi nung Malaysian nunger tarep ya 11-8 agi tejakdang liasü, ajisüaka Dhruv aser Tanisha nati iba mapang tashi nung kanga junga asaya liasü.

Point 16-16 aliba mapang Toh ya mapang talangka atema medical break agi aser la temekok alepbanga liasü, ajisüaka lai masayatsü asoshi telemtetba agia liasü.

Tia maka iba sülen Toh-i point ana atema dang asayatet aser 18-16 ta tena tejakdang aliba mapang asaya nungi anentsüsa aküm.

Iba sülen Toh ya wheelchair ka nung anir tugo. Dhruv aser

Tanisha nati asayar tanüla tajung sayua la yiruba indang ashishia liasü.

Dhruv aser Tanisha na semifinal nuhng Japan nunger tarep Yuichi Shimogami aser Sayaka Hobara na den asayatsü. Tenati Hokolbarnü second-seeded Thai nunger tarep Dechapol Puavaranukroh aser Supissara Paewsampran na game asem kanga toktepa asayaba sülen koka liasü.

Hokolbarnü tesür kija asaya nung PV Sindhu bo top seed An Se Young-i straight games nung tsükdaktsüogo. Sindhu-i kanga junga attack süa asaya, saka An-i tongtibang mapangtem nung asaya kanga junga aziükteta asaya-a iba asaya 21-17, 21-14 agi koka liasü.

Iba asaya makokba sülen Sindhu-i asaya teku nung An ya tang tashi nung khen danga koka mali.

## Davies Canada World Cup squad nung züngoksemogo

**Monupii/May 30, 2026 (Agencies):** Taruba ita asayatsü aliba World Cup atema Head coach Jesse Marsch-i Canada squad nung Bayern Munich defender Alphonso Davies-a züngoksemogo.

Arishi küm 25 tain Davies ya hamstring yirur aliba taneptsü junga mongui lir, saka pa squad nung züngoksemsü atema temsüa lir ta bilemer. Kasa mapang nung Juventus forward Jonathan David-a squad nung zükgoksemogo.

Porto midfielder Stephen Eustaquio, Villarreal nungi Tajon Buchanan aser Tani Oluwaseyi na aser Southampton forward Cyle Larin nungera squad nung densema lir.

Bayern Munich pur Champions League semi-final nung Paris St-Germain-i tsükdaktsüba asaya nung yiruba sülen Davies ya June 12 nü Canada team mezüngbuba asaya Bosnia aser Herzegovina na den asayatsü aliba nung asayatetsü masayatetsü mejangjai lir.

Pa October ita anterior cru-

ciate ligament (ACL) yiruba sülen ita ti masayatet aser meyipa aruru asayaba mapang ano tetsü aiben yirua liasü.

"Onoki onok indang core group ya kechi asütsü aji meteta liasü. Ajisüaka shirnok anema alitsü aser form nung ali parnok jangjatsüji dang terata nung liasü," ta Marsch-i ashi.

"Tia ka-a asayar aika onoki bilemba ama anema junga asayadar. Bosnia den asaya nung ajak 100% asütsü asü? ajitabo masütsü. Ajisüaka onok team tashi tait asütsü aser asaya atema renema alitsü, aser asayamung asayayonga aoba mapang onok tashi taitba akümstsü ta amanger," ta paisa shisem.

World Cup ayongzüka asaya linüktem rongnung Canada-a ka lir aser parnok group game asemprongla kidang asayatsü.

Toronto nung mezüngbuba asayaba sülen Qatar aser Switzerland na den Vancouver nung asayatsü.

Canada, US aser Mexico nung team 48 asayatsü aliba asayamung ya June 11 nungi

July 19 tashi asayatsü.

Canada World Cup squad: Goalkeepers: Dayne St Clair (Inter Miami), Maxime Crepeau (Orlando City), Owen Goodman (Crystal Palace).

Defenders: Alistair Johnston (Celtic), Derek Cornelius (Marseille), Richie Laryea (Toronto), Niko Sigur (Hajduk Split), Joel Waterman (Chicago Fire), Luc de Fougerolles (Fulham), Moise Bombito (Nice), Alphonso Davies (Bayern Munich), Alfie Jones (Middlesbrough).

Midfielders: Stephen Eustaquio (Porto), Ismael Kone (Sassuolo), Tajon Buchanan (Villarreal), Mathieu Choiniere (Los Angeles FC), Ali Ahmed (Norwich City), Nathan Saliba (Anderlecht), Liam Millar (Hull City), Marcelo Flores (Tigres UANL), Jacob Shaffelburg (Toronto), Jonathan Osorio (Toronto).

Forwards: Jonathan David (Juventus), Cyle Larin (Southampton), Tani Oluwaseyi (Villarreal), Promise David (Union SG).

## Asian Games longlist nung Suryakumar Yadav mali

**Monupii/May 30, 2026 (Agencies):** 2026 Asian Games atema asayar 30 agi künftetba India tebur cricket probables list nung Vaibhav Sooryavanshi-a züngoksema lir, saka T20I captain Suryakumar Yadav aser Test aser ODI skipper Shubman Gill na densema mali.

Board of Control for Cricket in India (BCCI)-i Asian Games matong tsungda Indian Olympic Association (IOA) nem longlist ka agütsüogo. Asian Games ya taküm Aichi-Nagoya, Japan nung September 19 nungi October 4 tashi asayatsü.

Gill aser Suryakumar na iba list nung mezüngoksemba ya India team asayamung aika asayatsü aliba dak sendaka lir. Asian Games cricket asayamung ya India team kidang West Indies den white-ball asayamung ka asayatsü aliba den denchiteper, aser iba ajanga asayar shimertemi iba asayamung ana atema squad balala renemtsüsa akümer.

India aser West Indies na ODI asem aser T20 Internationals pongu asayatsü lir, koba September 27 nungi October 17 tashi asayatsü. Iba asayamung nung India ODI team Gill lenisüba nung asayatsü imlar asünung asaya shimertemi

pa Asian Games pool nung mezüngoksem. Asian Games nung cricket asayamung ya September 24 nungi October 3 tashi asayatsü, ibayongji asayamung ana ya tsükteper aser squad ana shimtsü atema asayar aika shimtsüsa kümogo.

Ibayongji BCCI-i asayar 30 tenüng agütsüogo, shirnok asayamung ana atema ya team ana küma lemdangtsü.

Team nung T20I captain Suryakumar Yadav maliba ya imla malibaka, ajisüaka 2028 Los Angeles Olympics aser taruba T20 World Cup cycle dak rangloker selector temi iba telemtetba agi asütsü ta bilemer.

Gill aser Surya na maliba mapang Asian Games squad ya Shreyas Iyer, Sanju Samson aser Tilak Varma nunger rongnung ka lenisüba nung asayatsü akok ta bilemer.

Asayamung aika asayatsü liaka Jasprit Bumrah bo list nung züngoksema lir, saka pa 2027 ODI World Cup atema renemshiba mapang West Indies den ODI asayamung nung asayadaktsütsü imlar. Asayar tejentem rongnung Hardik Pandya, Rishabh Pant, Axar Patel, Kuldeep Yadav, Arshdeep Singh, Washington Sundar aser Nitish Kumar Reddy nunger densema lir.

## Liverpool-i caoch Arne Slot mapa nungi anentsüogo

**Monupii/May 30, 2026 (Agencies):** Liverpool-i coach Arne Slot mapa nungi anentsüogo, ta Merseyside club yagi sangdong ka ajanga metetdaksü. Mezüngbuba season nung Premier League title abenba sülen imlaba ama masayateti 2025-26 season nungi anentsüogo.

Taoba mapang Feyenoord coach Slot yagi 2024 küm Jurgen Klopp melen aser mezüngbuba season Liverpool pur Premier League takok dangi ania liasü.

Ajisüaka Liverpool nung tanabuba season nungbo parnok title defence asütsü melena Champions League atema qualify asütsü atema-ang meranga asaya liasü. Parnoki domestic cup-a dena ka danga mekokteti liasü.

"Club ka ama iba telemtetba agitsü ta temela masü asü. Liverpool FC nung inyakba mapang Arne-i club nem teyari tulu agütsüogo aser club takok dangi angiogo," ta Liverpool-i Honibarnü sangdong ka ajanga metetdaksü.

"Arne den ajurutepeba mapang nungi pa ya khuret agizükba nisung ka dang masü

saka bendanga agüja inyakba nisung ka ta jangja aküm."

"Pa head coach agizükba mapang, pai onok Premier League takok dangi anidang aser season tepyong pai tetsükdaktsü aser khuret aika ajangshia aoba mapang iba ya jangja aküm," ta club-isa metetdaksü.

"Kasa mapang nung club maneni tejakleni renloka aotsü asoshi temelenshi nüngdaker ta onoki asatetogo. Maneni iba telemtetba ya züba züba agiba masü ta nenshir," ta kasa sangdong ajanga metetdaksü.

Liverpool-i ashiba agi, pa melener bushitsü atema inyakyim tenzüko. Media osang balala ajanga ashiba agi, coach atema Andoni Iraola shimtsü akok, shibai Bournemouth pur league nung jenjang trokbuba tonga aniba den tang mezüngbuba Europa League atema qualify sütetdaksüogo.

Asaya ishika junga masayatetba sülen fan temi Slot anema nokdak tenzüko. Parnok iba season asaya 19 tashi nung tamakok ngua liasü. Kasa mapang nung pa asayar kar den meputei aküm aser Mohamed Salah-ibo iba indang yimjak nung jembiogo.

### **BILEMDANGANG**

**"Tatalokba karbo asenoki maginer saka agizüktsüsa akümer."**